

vn Chrestien nommé Bernard homme de bien & courageux, il y a plus d'honneur de vaincre des gens armez que des courreurs de bestes. Diescaret qui conduisoit cette petite escoüade sa va mettre iustement où ces deux canots venoient aborder, le premier qui portoit cinq [*sc.* sept] hommes approchant & ne pensant point à cét embuscade se veit salüé de six coups d'arquebuses, qui furent si adroitement deschargez qu'ils renuerferent six hommes, & le septième se fauva à la nage tirant vers l'autre canot qui venoit derriere. Ce canot ayant pris ce fuyart ne perdit point cœur, il se destourne de sa route pour aller aborder l'Isle par vn autre [70] endroit & combattre à terre; mais nos Algonquins leur vont couper chemin par dedans le bois, ils estoient huit foldats dans ce second batteau bien deliberez de venger la mort de leurs gens; mais vn coup d'arquebuse renuerfant l'vn de ces guerriers, fit aussi renuerfer le canot dans l'eau, comme ils auoient pied, ils reprennent courage, ils se presentent pour aborder la terre, nos Algonquins leur vont à la rencontre, ils se batent vaillamment de part & d'autre; mais Dieu donnant l'auantage à nos gens, ils renuerferent quatre Iroquois dans l'eau & les massacrerent à mesme temps: les trois autres redoutans les vainqueurs tournerent visage; mais Bernard pourfuiuit le plus grand, & luy donnant vn petit coup d'espée dans les reins, luy crie, Camarade rends-toy, autrement tu es mort. L'autre qui estoit plus ieune fut bien-toft attrapé, & le troisième se fauva: voila comme sept hommes en tuerent vnze & en amenerent deux prisonniers. Le Combat cessé les victorieux vont chercher les corps morts; ils enleuent la cheuelure de leurs testes, & puis s'embarquent pour leur retour.